



RAI NARUK FISKÁL


La'o Hamutuk preokupa ona iha tinan barak katak Timor-Leste sei hasoru krize finanseiru, nune'e La'o Hamutuk rekomenda atu iha seriadade no investe maka'as ba setór produtivu sira hanesan Agrikultura, Saúde, Edukasaun, manufatura no setór sira seluk. Maske nune'e infelizmente, seidauk iha serteza husi investimentu sira liu husi Orsamentu Jerál Estadu, no iha tinan rua ikus, publiku no governu hahú preokupa no ko'alia kona-ba osan atu hotu iha tinan 10 oin mai ka la to'o tinan 10, ka matenek na'in sira dehan Rai Naruk Fiskál, nune'e ita presiza atu hatene saida mak:

RAI NARUK FISKÁL?

Rai-naruk fiskál hanesan termu ka liafuan ida hodi esplika situasaun finanseiru nasaun ida ne'ebé laiha ona osan atu sustenta nia despeza liu husi programa sira. Ho nune'e, tenke ko'a osan derrepente no la hanesan ona tinan antes ne'ebé sempre iha osan boot hodi finansia nesesidade hotu-hotu, atu ilustra hanesan estadu monu ona ba rai naruk.

Parlamentu Nasional ne'ebé iha knar seluk alende halo fiskalizasaun, halo mós revizaun no rekomendasaun ba programa governu maibé infelizmente tinan barak ona, seidauk bele aseguara investimentu husi retornu ekonómiku nian.

Úniku dalan, Governu tenke kontrola nia despeza no Parlamentu Nasional halo kontrolu maka'as ba investimentu ne'ebé bele iha valor ekonómiku atu aseguara finansiamentu estadu ho sustentável.



Imajen; NBC News & FB Turizmu Timor-Leste

Tanbasá Timor-Leste Hasoru Rai Naruk Fiskál?



Imajen: The Fiscal Time

Despeza Estadu durante ne'e maioria mai husi Fundu Petróleu, rezultadu husi atividade produsaun mina-rai no gas iha kampu Bayu Undan no Kitan hodi konverte ona ba osan. Balansu Fundu Petróleu hahú tun ba daudaun no iha tempu hanesan Kampu produtivu hanesan Bayu Undan atu hotu ona iha tinan 2023 no Kampu Kitan dezde tinan 2015 laiha ona.

Tinan-tinan, estadu hasai osan husi Fundu Petróleu liu husi Orsamentu Jerál Estadu, atu kria kondisaun di'ak ba nasaun ne'e nia vida tomak. maibé iha tinan barak nia laran kuaze osan metade mak semo hotu ba rai li'ur no la konsege prepara kondisaun atu asegura nasaun nia vida inklui mós povu.

Timor-Leste sei hasoru duni Rai Naruk Fiskál tanba alende kampu mina-rai no gas limitadu no iha tempu hanesan la konsege maximiza balansu Fundu Petróleu hodi investe ba asegura sustentabilidade estadu no povu.

Prevene no tenke iha ona seriadade no kuidadu liu bainhira foti osan hodi investe, nune'e de'it mak bele salva estadu ida ne'e nia vida no lori duni povu ne'e ba moris di'ak no atinje duni libertasaun de povu. Atu prevene, dalan mak halo redusaun ba Orsamentu Jera Estadu kada tinan ba programa sira ne'ebé la nesesáriu no investe ba setór produtivu sira no tenke iha kometimentu.



Imajen: The Fiscal Time


Timor-Leste iha Setór Produtivu ka lae?

Timor-Leste iha area potenciál balun ne'ebé bele aproveita hodi estadu no povu laele depende ba rai seluk atu fornese ai-han.

Area ida mak setór agrikultura, no Timor-Leste iha area natar potenciál, atu bele aproveita ba prodús foos, area ne'e hamutuk 81,000 resin ektares maibé la konsege utiliza hotu, no maximiza de'it 20,000 resin ektares, nune'e kada tinan Timor-Leste nia dependénsia ba foos husi rai li'ur kuaze 156,000 resin tonelada. Tanba area ne'ebé maximiza bele halo produsaun hamutuk, 60,000 - 70,000 tonelada.

Area potenciál no produtivu sira ne'ebé iha, tendénsia transforma ba harii indústria sira ne'ebé fó in-serteza ba nasaun ne'e nia vida, hanesan Projetu Tasi Mane, iha tempu uluk tasi mane (Husi Viqueque, Manufahi to'o Covalima) konsidera hanesan *Celeiro de nação*, maibé ohin loron hakarak transforma ba indústria mina-rai no gas.


Produsaun VS Importasaun Foos



Grafiku husi La'o Hamutuk bazeia ba Bulletin Seguransa Ai-han MAP


Setor seluk ida tan ne'ebé konsidera hanesan fonte reseita ba estadu mak Peska.

Illa Timor-Leste hale'u ho tasi, no maske Timor-Leste seidauk rezolve fronteira Tasi entre Indonézia no ho totalmente ho nasaun Australia maibé iha potencialidade iha futuro, bele maximiza hodi kontribui ba reseita estadu, liu husi aplika taxa ba empresario boot sira ne'ebé buka no kaer hela ikan iha area marítimu tasi timór, no iha tempu hanesan, bele redús mós importasaun ikan, tanba Ministériu Agrikultura, Pekuaria, Peska no Floresta (MAPPF), informa katak iha trimester primeiru (Janeiru - Marsu) 2022, Timor-Leste importa ikan hamutuk 1,000 resin tonelada.



Imajen; Sharing RPP.com

Area Timor-Leste kobre husi Kontratu Fahe Produsaun ba esplorasau mino no gas



Mapa husi La'õ Hamutuk bazeia ba informasaun husi ANPM RDTL no fonte seluk. Outubru 2023

Rezerva Mina-rai no Gas Timor-Leste, tenke rekoñese katak la barak hanesan publiku dala barak ko'alia, tantu area rai maran no mós tasi laran. Kampu balun hanesan Buffalo no Kanase inísiu deskonfia iha rezerva mina-rai no gas boot, maibé rezultadu hatudu mina no gas iha rai okos la suficiente atu hasai hodi hetan osan, tanba kustu ka osan hodi gasta ba hasai mina-rai no gas, boot liu fali rezerva mina-rai no gas iha rai okos.

Iha area rai maran, dezde 2021 halo ona perfurasaun iha Munisípiu Covalima maibé to'õ Setembru 2023 seidauk iha rezultadu katak posu tolu ne'e iha rezerva mina-rai no gas boot (komersiál). Kampu Greater Sunrise iha Area Tasi, projeta sei fó retornu ekonómiku no sosiál maibé to'õ tinan 2023 atu remata maibé seidauk iha serteza ba pipe line no konkordánsia ba produsaun.



LA'Õ HAMUTUK
 Rua Dom Alberto Ricardo, Bebora
 Dili, Timor-Leste
 Tel: +670-3321040
 +670-77234330

Vizita ami nia website hodi asesu informasaun barak liu tan!
[www.https://www.laohamutuk.org](https://www.laohamutuk.org)

Informasaun: Imajen sira maioria hetan husi google, exseptu imajen ikus no gráfiku produsaun no importasaun foos, La'õ Hamutuk nia obra.